

集
古
官
印
考

集古官印攷卷十

嘉定瞿中溶編輯

男樹鎬校刊

龜鉗

右關外侯印集古印譜曰黃初定制關外侯爵十六級銅印龜鉗墨綬又宋馬永卿嬾真子云僕仕於關中嘗見一方討古印文云關外侯印其字作古隸氣象頗類受禪碑僕意必漢末時物也然疑只聞有關內侯不聞有關外侯後於魏志見之建安二十三年

始置名侯及十二級以賞軍功關外侯乃其一也注云今人虛封蓋始於此則此印亦可當屬之漢矣

吳氏

右菑川侯印案漢書地理志菑川國故齊文帝十八年別爲國後并北海攷王子侯表文景時齊悼惠王子懿王志及武城侯賢皆徙封菑川王菑菑古通印文上从十而中變从一繆也漢以菑川郡封王子即改稱國然係郡王而非郡侯菑川既以齊郡改封

而又不設苗川縣則此非漢印可知漢無公侯伯子
男五等封爵王莽雖曾設置而此印文非五字與其
制不合故定爲魏物攷晉書地理志魏文帝黃初三
年初制王之庶子爲鄉公嗣王之庶子爲侯公侯之
庶子爲亭伯劉備章武元年亦以郡國封建諸王或
遙採嘉名不由檢土地所出孫權赤烏五年亦取中
州嘉號封建諸王晉文帝爲晉王命裴秀等建立五
等之制如魏武帝泰始元年封諸王以郡爲國又職
官志言歲甯三年衛將軍楊珧與中書監荀勗以齊

王攸有狀望懼惠帝有後難因追故司空裴秀立五等封建之旨從容共陳於是詔議其制奏從諸王公更制戶邑大國小國皆制所近縣益滿萬戶又爲郡公制度如小國王郡侯如不滿五千戶王于時惟增魯國公戶邑進封故司空博陵公王沈爲郡公鉅平侯羊祜爲南城郡侯又南宮王承隨王萬各於泰始中封爲縣主邑千戶至是改正縣王增邑爲三千戶制度如郡侯自此非皇子不得爲王而諸王之支庶皆皇家之近屬至親亦各以土推恩受封其大國次

國始封王之支子爲公承封王之支子爲侯繼承封
王之支子爲伯小國五千戶以上始封王之支子爲
子不滿五千戶始封王之支子及始封公侯之支子
皆爲男非此皆不得封其公之制度如五千戶國侯
之制度如不滿五千戶國伯子男以下各有差唐六
典注云後漢又有鄉亭侯之號魏氏五等皆以鄉亭
多假空名不食本邑及司馬宣王誅曹爽封舞陽侯
至晉復五等之制宋齊之後或置或廢亦不常也此
印見范氏印譜云鼻紐文與此不異蓋先爲范氏所

藏也

桂氏

右膠西侯印案漢書地理志高密國故齊文帝十六年別爲膠西國又王子侯表齊悼惠王子平昌侯印後封膠西王則膠西亦漢王國而此云侯與前菑川同

大年據印章摹補案繆篆函下注膠西侯印幌下注膠西侯印今審印文實侯字西下注誤也郡國

候散見漢書志傳詳印志

龜金顧謹

右綏武侯印案地理志朔方郡沃蠻莽曰綏武此印
宜是王莽時鑄然形制大而所見莽時官印多五字
皆爲不合綏武或非地名當與前菑川膠西二侯印
同爲魏以後物

范氏龜金

右林慮侯章案林慮本漢縣西漢曰隆慮後避諱改
晉書地理志屬汲郡此印文多舛繆又改印爲章皆
與前數印異恐非同時物

右華陰伯印案地理志華陰屬京兆郡故陰晉秦惠
文王五年更名甯秦高帝八年更名華陰太華山在
南續漢書郡國志改屬宏農晉志同

金氏範錄

左林慮子章林慮詳前疾印

右泉州子章泉州亦漢縣屬漁陽郡晉志屬燕國云
疾相

楊氏譜

右樂浪口章案章上一字亦當是子樂浪乃漢郡屬幽州應劭曰故朝鮮國也晉志屬平州

右白馬子章案白馬亦漢縣屬東郡晉志屬濮陽國即分東郡置也此印大而文多繆

石城紀子章案城紀縣前漢晉皆屬天水郡東漢屬

漢陽郡城皆作成城成古通此印文亦多繆

右彭城子印案彭城漢縣屬楚國後漢改國名亦曰彭城晉因之此稱印不稱章與前華陰伯印同

右口縣子章縣上一字不可辨

右盱眙男章盱眙亦漢縣西漢屬臨淮郡東漢屬下邳國盱眙作古晉志亦屬臨淮宋書州郡志改爲盱眙太守而無縣矣

右興樂男章案漢魏以下郡縣皆無名興樂者或亦劉備封國所謂遙採虛名不由土地所出者也

右平陸男印案平陸亦漢縣屬西河郡魏晉以下無
平陸蓋封建可用舊名或亦劉備章武時所封之國
也惟形制長方又稱印不稱章恐是私記

查氏

右宜陽侯相之印攷宜陽漢縣屬宏農郡晉因之後
漢有宜陽金門侯李璋以尙書不附梁氏延熹二年

八月封据劉瑜傳作亭侯璵作偉見熊表此印文多之印二字與漢印異而與弋陽郡丞之印相似當是魏印

桂氏

右印文曰曰里子尉案里上一字似貴桂氏釋作貴然皆無攷其云尉者蓋亦同漢制侯國有尉也

大年據印叢摹補

顧譜鼻錕

右司徒左長史印集古印譜曰東漢百官志司徒公一人世祖卽位爲大司徒建武二十七年去大長史一人千石晉加置左右長史各一人秩千石而攷魏志言孫詠爲司徒左長史則魏已加左右非始於晉也

范氏鼻錕

右印文曰驛驅別丞案宋志驛驅廄丞一人漢西京爲龍馬長東京爲未央廄令魏爲驛驅令此印云別丞豈驛驅廄不止一丞卽漢別部司馬之意邪

顧譜

右安東將軍章攷宋書百官志安東將軍漢末陶謙爲之惟此印較大而文多屈曲與漢印不類晉書百官志序言四征興於漢代四安起於魏初故附此

顧譜龜鉦

右印文曰平西將軍案宋志平西將軍一人四平魏
置集古印譜曰晉周處爲平西將軍沈約宋書臨川
王義慶爲平西將軍後齊四平將軍正三品梁以四
平四翊爲十班陳四平品第三秩中二千石藏義興
周孝侯廟廟祝世掌之中溶攷蜀志馬超封爲平西
將軍則非始於晉明矣

顧譜

右印文曰冠軍將軍案宋書百官志冠軍將軍魏正始中以文欽爲之

顧譜

右印文曰伏波將軍制與前同故定爲魏物

顧譜

右印文曰討虜將軍集古印譜曰建安五年曹操表
孫權爲討虜將軍領會稽太守中溶攷東觀漢記光
武以王霸爲討虜將軍擊黃憲則東漢初已有之惟
此印止四字形制亦與前同故列於魏此印亦見范
譜文略同云龜鈕

右印文曰討難將軍案宋志討難將軍在四十號將
軍內云或是後漢及魏所置

查氏

右印文曰明威將軍案明威將軍見宋志四十號內此印亦止四字當與前同

吳氏

右明威將軍印案此亦明威將軍而有印字不全又文作兩行而多繆體皆與前異

右武奮將軍印見宋志四十號將軍內此上印兩行
與前制同下印小而長爲異

右厲武將軍印案厲武將軍亦見宋志四十號內略
與前同

右印文似是討寇將軍印而文多繆案討寇將軍亦見宋志四十號內形制略與前同

印存

右印文曰掃逆將軍司馬案宋志四十號將軍內有
掃逆云或是後漢及魏所置此印文頗工整然有六
字與漢雜號將軍司馬印不同故列此

右牙門將印集古印譜曰魏黃初置冠服與將軍同
王隱晉書云陸機少襲父爵爲牙門將中溶案牙門
即後代所呼之衙門也其說詳王楙野客叢書及周
密齊東野語

塗金龜鉤

張氏

右牙門將印章此二印形制字文頗類漢印而較大

嘯堂集古錄所摹與第三印略同

顧譜鼻鈕

右牙門將印章案印文作兩行形制有異恐非同時
物

塗金龜鈕

右牙門將之章案印文改印爲之又與前異

龜鉏

龜鉏

右騎督之印集古印譜曰魏晉第五品有騎督高貴
鄉公紀騎督敬琰魏志騎督偏將軍路蕃楊宗道印
譜云晉彭祈碑陰題名其官屬有騎督步督散督之
號中濬攷三國魏志甘露五年有騎督成倅刺殺高
貴鄉公注引魏氏春秋同又晉書輿服志中朝大駕
鹵簿有羽林騎督幽州突騎督

桂氏

右校督之印案校督蓋騎督之類

大年據印史摹補

桂氏

右散督之印案散督恐亦騎督校督之類

大年據印正摹補印史亦有

桂氏

右散部曲將印章案散部曲將猶言散督也恐同時物

鼻鉢

右部曲督印集古印譜曰孫皓天紀三年夏郭馬反
馬本合浦太守修元部曲督晉紀李庠傳趙欽將有
異志委庠以心督表爲部曲督晉世祖武帝咸甯五

年除部曲督以下質任中溶攷魏志甘露二年詔部
曲督秦絜秉節守義以其子爲騎都尉

印叢龜鉏顧諤鼻鉏

右印文曰副部曲督案副部曲督當即部曲督之武

桂氏

右魏興太守章攷兩漢無魏興郡宋志魏興太守魏
文帝以漢中遺民在東垂者立屬荊州

太年據印史摹補

碑譜龜鉢

右弋陽郡丞之印案宋書州郡志云弋陽太守本縣名屬汝南魏文帝分立領縣六晉志云魏文分汝南立弋陽郡統縣七

林氏

右口陵郡丞之印案此印字文略同前當爲三國時

印攷晉志郡以陵名者有五廣陵武陵皆承漢之舊名又有零陵邵陵毗陵三郡此未知何郡

大年據潘譜摹補

右口口郡丞之印案印文剥落首二字不可辨

吳氏

右許昌令印案續漢書郡國志潁川郡許劉昭注左

傳莊二十八年楚伐鄭鄭奔桐丘杜預曰縣東北有
桐丘城獻帝徙都改許昌而攷獻帝紀建安元年八
月庚申遷都許但云許不云改許昌又宋志潁川太
守下云永初郡國又有許昌注云本昌許漢舊縣魏
曰許昌又晉志云漢獻帝都許魏禪徙都洛陽許宮
室存焉改爲許昌則許昌名縣自應屬之曹魏劉昭
注誤也據此印文多繆亦不類漢物可定爲魏印范
譜有此印云鼻鈕皆與此合蓋即范所藏物

右印文曰親魏倭王攷漢書地理志夫樂浪海中有倭人分爲百餘國以歲時來獻見云如湻曰如墨委面在帶方東南萬里臣瓊曰倭是國名不謂用墨故謂之委也師古曰如湻云如墨委面蓋音委字耳此音非也後音一戈反今猶有倭國魏略云倭在帶方東南大海中依山島爲國度海千里復有國皆倭種又後漢書光武紀中元二年東夷倭奴國王遣使奉

獻文和帝紀永初元年十月倭國遣使奉獻章懷注
倭國去樂浪萬三千里男子黥面文身以其文左右
大小別尊卑之差見本傳太平寰宇記云倭國自後
漢通焉古倭奴國也在新羅東南大海中世世依山
島爲居凡百餘國後漢書云建武中元二年倭奴國
奉貢朝賀使人自稱大夫

大年據印史摹補

桂氏

右印文曰魏率善氏邑君氐邑君已詳漢攷魏志建
安十八年馬超在漢陽復因羌胡爲害氐王千萬叛
應超屯興國使夏侯淵討之二十年曹操西征張魯
至陳倉將自武都入氐氐人盡遁乃自陳倉以出散
開至河池氐王竇我衆萬餘人恃險不服操攻屠之
元康元年七月武都氐王楊僕率種人內附居漢陽
郡太和三年十二月大月氐王波調遣使奉獻以調
爲親魏大月氐王此蓋其部落也又三國魏志東夷
傳注魏略曰西戎傳曰氐人有王所從來久矣自漢

開益州置武都郡排其種人分嵒山谷間或在福祿
或在汧隴左右其種非一稱槃瓠之後或號青氏或
號白氏或號虹氏此葢蟲之類而處中國人即其服
色而名之也其自相號曰益雅各有王侯多受中國
封拜近去建安中興國氏王阿貴白項氏王千萬各
有部落萬餘至十六年從馬超爲亂超破之後阿貴
爲夏侯淵所攻滅千萬西南入蜀其部落不能去皆
降國家分徙其前後兩端者置扶風美陽今之安夷
撫夷二部護軍所典是也其太守善分留天水南安

界今之廣平魏郡所守是也其俗語不與中國同及羌雜胡同各自有姓姓如中國之姓矣多知中國語由與中國錯居故也其自還種落間則自氏語其嫁娶有似於羌此蓋乃昔所謂西戎在於街冀獮道者也今雖都統於郡國然故自有王侯在其虛落間有故武都地陰平街左右亦有萬餘落

大年據印史摹補

右印文曰魏率善氏邑長同前

印存

右印文曰魏率善氏仟長同前

印存顧譜獸纽

右印文曰魏率善氏佰長同前范譜有一印略與此
同皆云駝紐

駢錄

顧譜

右印文曰魏率善羌邑長羌詳漢同前

趙摹

右印文曰魏率善羌仟長同前

金氏顧譜鼻金

右印文曰魏率善羌佰長同前

駝鋗

印存金氏顧譜駝鋗

右印文曰魏率善胡仟長胡詳漢同前

印存顧譜

右印文曰魏率善胡佰長

顧譜駝鋗

右印文曰魏率善叟仟長叟詳漢同前

右印文曰魏率善俊邑長詳後晉率善俊領長印
大年據陳墳青屏山館印集摹補

查氏

右印文曰魏烏丸率善邑長烏桓詳漢同前攷魏志
景初元年七月孫權遣幽州刺史毋丘儉率諸軍及
鮮卑烏丸屯遼東南界又烏丸單于寇婁敵遼西烏

丸都督王護留等居遼東率部衆隨儉內附又攷烏
丸之丸范史及漢李剛石室畫像皆作桓而三國魏
志即作丸與魏晉諸印同

印存

右印文曰魏烏丸率善仟長同前范氏譜有二印略
與此同皆云駝紐

金氏顧譜駝紐

右印文曰魏烏丸率善佰長同前

右印文曰魏屠各率善仟長屠各詳漢同前山左金石志云屠各乃北方種落之名後漢書公孫瓚傳瓚子續爲屠各所殺晉書載紀王延罵斬準曰屠各逆奴十六國春秋劉粲傳李矩曰劉淵屠各小醜此印亦置戊巳校尉時所製也

右印文曰魏層各率善伯長同前

駢鉏

右印文曰魏蠻夷率善邑長蠻夷有邑君長皆賜印
綬已見後漢書南蠻傳此印據錢同人印本摹錄

金氏虺鉏

右印文曰魏蠻夷率善仟長蠻夷詳漢同前

塗金龜紐

右新定縣侯之印案宋書百官志縣侯第三品又州
郡志甯州刺史建甯太守新定長晉太康地志有又
揚州刺史新安太守遂安令孫權分歙爲新定縣晉
武帝太康元年更名則孫吳時已有新定矣

印存

右東陽亭侯之印案兩漢皆有東陽晉升爲郡宋志
東陽太守下云本會稽西部都尉吳孫皓寶鼎元年
立又攷後漢末曹休以中領軍從操征代延康元年
封東陽亭侯又有東陽亭侯宣鄧見桓帝紀延熹九年
注惟此印文六字與漢四字有異與前新定縣侯
之制同或寶鼎以前未升郡時所封或即以郡之亭
封之其制不同也

湯氏

右趙郡內史章攷晉書職官志郡皆置太守河南郡
京師所在則曰尹諸王國以內史掌之太守之任又
攷漢書百官公卿表內史周官秦因之掌治京師景
帝二年分置左右內史右內史武帝太初元年更名
京兆尹左內史更名左馮翊則他郡不當有內史也
又諸侯王國有內史治國民綏和元年省內史令相
治民則又當稱國而不當稱郡也惟據宋書州郡志
言零陵內史漢武帝元鼎六年立領縣七則他郡似
亦或可設而據宋志所載有郡內史皆吳時立則此

當爲吳印印文五字與王莽制同攷兩漢晉宋史志皆無趙郡之稱惟後魏書地形志殷州有趙郡此印篆文不工或是晉宋以後之物因無確證姑附於此

桂氏

右興道長印案晉志漢中郡有興道又宋志甯浦太守下引吳錄孫休永安三年分合浦立爲合浦北部都尉領平山興道甯浦三縣

大年據印史摹補

桂氏

右印文曰軍議校尉攷三國蜀志法正爲軍議校尉則此當爲蜀漢印

大年據印正摹補

顧譜鼻鉢

右印文曰虎步司馬山左金石志云虎步之設不見漢百官晉職官二志而水經渭水過武功縣北下酈

注曰諸葛亮表云臣遣虎步監孟琬據武功水東又
諸葛亮與張飛書曰須先教中虎步兵五六千人則
是虎步之官蜀漢所設也

印叢編 錄顧譜鼻錄

若印文曰虎步安搏司馬案集古印譜搏誤作捷山
左金石志云安與搜通搏與捕通蓋虎步之官內有
監有搜捕司馬

印叢駁錄金氏顧譜瓦鉏

右印文曰虎步挫鋒司馬案此蓋亦虎步之司馬與
搜搏印異名集古印譜曰鋒字當从弓今從手漢逢
童子碑逢字亦然

顧譜穿鉏

右印文曰虎步蟬尉司馬案尉上一字當是都或亦
虎步司馬之別名也顧氏言印上刻建武元年正月

給定爲石虎時印姑附此

右印文曰平寇都尉司馬攷平寇將軍見隋志言梁一百九號將軍內此言都尉司馬與前虎步都尉司馬文同恐爲同時物故列於其後

集古官印攷卷十一

嘉定瞿中溶編輯

男樹鑄校刊

顧譜塗金龜鈕

右樂安王章案後漢改千乘郡爲樂安國晉志樂安國屬青州集古印譜曰漢和帝改千乘王寵國爲樂安王晉初封皇子鑒惠帝封齊王問子冰皆爲樂安王前漢表云諸侯王金璽鑿綬漢舊儀云諸侯王金印橐佗鈕文曰璽刻曰某王之璽晉志云凡王金印

龜鈕鍊朱綬蓋改用龜鈕不復言璽矣此印鈕龜而文曰章決非劉寵國佩豈晉以假司馬鑒或司馬冰邪中溶攷晉書文六王傳樂安平王鑒文帝子初封臨泗亭侯武帝踐阼封樂安王元康七年薨子殇王籍立薨無子齊王冏以子冰紹鑒後以濟萬一千二百一十九戶改爲廣陽國立冰爲廣陽王冏敗廢

玉印螭鈕

右穀城王印攷漢書地理志穀城屬河南郡郡國志

改郡爲尹成作城又東郡亦有穀城云春秋時小穀
晉志屬濟北國亦作城宋志云濟北太守穀城令前
漢無後漢屬東郡晉太康地志屬濟北皆與此印文
同兩漢無以縣封王國之制而攷漢書王莽傳有皇
孫功崇公宗葬于故同穀城郡之文則亡新曾以穀
城爲郡第封公而非王惟晉書職官志咸寧三年議
立五等封建制言時增魯國公戶邑追進封故司空
博陵公王沈爲郡公鉅平侯羊祜爲南城郡侯又南
宮王承隨王萬各於泰始中封爲縣王邑千戶至是

改正縣王增邑爲三千戶制度如郡侯然則晉代有
封縣王者矣晉書輿服志載諸王金璽龜鈕然如樂
安王章稱章不稱璽章與印同既可稱章則稱印者
亦必有之恐未必能畫一也或因縣王降於郡王故
改稱印耳史家由後代追撰每多遺略不詳且此係
玉印其鈕用蟠螭亦非龜鈕與志言皆不合也印爲
弔官長沙時所得篆文瘦勁有法可與漢銅印爭韻
頗玉色半白螭鈕皆水銀古非後代物可比也且因
所見古玉官印頗少故用顧氏之例附載焉

顧譜塗金龜鉦

右京兆郡開國公章集古印譜曰兩漢無五等爵曹操自封魏公而開國之號始見於晉令文帝黃初二年始封王之子爲鄉公其後以爲定制宋齊因之梁陳置九等郡有至嗣王藩王開國郡縣公開國縣侯開國縣伯子男其秩皆一品中溶攷兩漢京兆尹不稱郡稱郡亦始於晉晉書不詳開國之制而據隋書言梁武時制五等諸公位視三公班次之開國諸侯

位視孤卿重號將軍光祿大夫班次之開國諸伯位
視九卿班次之開國諸子位視二千石班次之開國
諸男位視比二千石班次之又言梁武受命之初官
班多同宋齊之舊而宋書百官志云宋氏以來一用
晉制則開國之稱當亦始於晉也又隋書禮儀志言
陳制開國公及侯伯子男皆金章龜鈕

桂氏

右綏建郡開國公章案宋志廣州刺史綏建太守文

帝元嘉十三年立宋承晉制此亦必晉印也又攷隋書地理志南海郡四會下云舊置綏建郡當即此

大年據印史摹補

顧譜龜鉦

右高安縣開國矣章案晉志無高安縣而攷宋志九真太守高安令下云何志晉武帝立太康地志無吳錄晉分常樂立又集古印譜引楊宗道印譜云文之上有金鉦五字云輔國將軍益古之虛爵也中溶攷

輔國將軍後漢置晉宋亦皆有之

印統

右開國男章此印無郡縣地名未知所屬又形制大而篆文亦甚繆恐晉以後物也

顧譜鼻鉢

右典祠令印案晉志東宮有典祠令集古印譜曰通志職官略東晉元帝太興元年始置九分食一王國

有傅友典書令丞文學郎中令中尉大農左右常侍
內史將軍典祠典衛學官令治書中尉司馬世子庶
子陵廟牧長謁者中大夫舍人典府等鍾爍詩有宋
典祠令任曇緒中溶攷晉志言武帝咸甯三年用故
司空裴秀所立五等封建法因置諸王公戶邑此印
但稱典祠令不係五等封爵當是東宮之官非王國
也乾隆間吳門李君煜得馮翊王國典祠令李和之
造像石刻以贈武林黃小松製爲研無年月云是北
齊造像玩其字體似北齊碑且所謂馮翊王當即造

平等寺碑之人也可知北齊王國有典祠令與晉宋同

右太原典書令印攷太原乃漢郡未嘗爲王國而晉書地理志作太原國攷諸王傳有太原成王輔咸甯三年自渤海王徙爲太原王又太原烈王瓌武帝受禪以固始子封太原王又攷百官志言王國有典書典祠典衛學官令典書令丞各一人江左以來伯子

男惟典書以下又無學官令矣又宋志云宋氏以來悉用晉制典書令在常侍下侍郎上江左則侍郎次常侍而典書令居下矣又諸王傳齊獻王攸傳言其後國相上長吏缺典書令請求差選即此官也又攷隋志云梁武時制公以下各置相典祠典書令典衛長六人而伯子典書謂之長典衛謂之丞男典祠謂之長典書謂之丞無典衛諸公以下臺爲選置相掌知百姓事典祠已下自選補又言相以下公文上事皆詣典書

吳氏

右壽張典書令印案壽張西漢名壽良屬東郡後漢光武避其叔父諱改曰壽張屬東平國晉志同則此當爲五等縣爵之官也此印見范譜與此悉合云鍍金龜鈕當先爲范所藏也

右觀陽典書令印案觀陽漢舊縣晉屬零陵郡此亦

縣爵之官與上壽張典書令同觀字文反

右印文曰北平國典書令攷晉志北平郡隸幽州而此印加國字去印字與前諸印不同或非同時物

印統

右印文曰汝南公典書丞攷兩漢皆有汝南晉志隸豫州此印汝南丞又有公字與前稱國又異據宋志

言晉有典書令丞及中尉常侍等又云江左以來公國無中尉常侍則公有典書丞明矣與梁制異故此印仍列於晉其印或與前諸印亦皆非同時物故文有不同耳餘詳上

范氏鼻钮

右上谷學官印放上谷漢舊郡晉隸幽州學官印詳前太原典書令下

桂氏

右印文曰東海廟長攷兩漢皆有東海郡晉隸徐州
晉志言王國有陵廟牧長各一人又攷東海王名越
爲高密王泰次子永嘉五年薨子沖嗣無子成帝更
以會稽忠王次子彥璋爲東海王繼沖爲曾孫爲桓
元所害國除詳晉書東海王越傳則此爲晉印無疑

印統吳氏

右印文曰下軍大夫案宋書百官志言晉制王國大國又置上軍中軍下軍三將軍次國上軍將軍下軍將軍各一人小國上軍而已又云中大夫六人則此當即王國之下軍中大夫而省去中字以四字爲文也其於大下旁加二小畫以爲夫字與李斯石刻同頗合古意

桂氏

右河東公主丞印攷兩漢皆有河東郡而公主有食

邑封縣不封郡此當是晉以後制也攷河東郡晉隸
司州晉書趙王倫傳言孫秀子會爲射聲校尉尚帝
女河東公主此或是歟

淮氏

右印文曰中尚方令攷宋書百官志云左右尚方令
丞各一人並掌造軍器秦官也於周則爲王府晉江
右有中尚方左尚方右尚方江左以來惟一尚方則
此印當爲西晉時物

鼻鈕

龜鈕

右印文曰殿中司馬案宋書百官志殿中將軍殿中司馬督晉武帝時殿內宿衛號曰三部司馬置此二官分隸左右二衛又見晉書輿服志大駕鹵簿

龜鈕

龜鈕

右印文曰殿中都尉集古印譜曰魏晉有此官晉武帝遺詔差殿中都尉司馬十人給楊駿令得持兵仗

出入中溶攷晉書輿服志中朝大駕鹵簿殿中司馬
中道殿中都尉在左殿中校尉在右

龜翫

右印文曰殿中校尉詳上

桂氏

右印文曰殿中都護案都護當亦都尉之類

桂氏

右印文曰殿中武力司馬疑亦殿中司馬之別名

顧譜

右印文曰武力司馬攷隋志梁大通三年二百四十號將軍內有武力將軍此或即將軍之屬因上殿中司馬亦有此名故列其後

顧譜鼻劍

右印文曰殿中太醫司馬案此蓋亦殿中司馬之別名范譜有此印文略同

印存

右印文曰太醫司馬案前有殿中太醫司馬則太醫司馬亦必同時設此官

右殿中中郎將印案兩漢但有中郎將及虎賁中郎將而攷晉書職官志言文帝爲晉王委任陳勰使典兵事蜀破後遂以勰爲殿中典兵中郎將則此稱殿中或即是也

右東中郎司馬印攷晉書職官志云四中郎將並後

漢置歷魏及晉並有其職江左彌重又言諸公及開府位從公爲持節都督增長史司馬等如從加兵公制又宋書百官志言東中郎將漢靈帝以董卓居之南中郎將漢獻帝建安中以曹植爲之凡四中郎何承天云並後漢置而攷晉書官四中郎將者甚多乃顯秩故皇子封王者亦常居之此印文云東中郎司馬者當即東中郎將之司馬也晉書太原成王輔傳言封渤海王之國後爲衛尉出爲東中郎將又莊王確

傳言歷東中郎將都督豫州諸軍事鎮許昌蓋都督
典兵出鎮與領軍大將同其下當有司馬則此印當
爲晉印無疑

右宗正偏將軍章攷漢書百官公卿表宗正秦官掌
親屬漢及後代皆因之晉職官志云宗正統皇族宗
人圖牒而攷晉制每以皇子封王者或爲宗正又都
督諸軍事出鎮或領兵征伐則此印文所云宗正偏

將軍者當是皇子封王爲宗正者領兵出征之屬官也

右大宰左司馬印攷古以太師太傅太保爲三公晉書及宋書官志言晉景帝名師採周官置太宰以代太師之任無其人則闕首以安平獻王孚居之自渡江以後其名不替而居之者甚寡又攷晉書安平獻王孚傳云封安平王進拜太宰持節都督中外諸軍

事備置官屬而攷高密文獻王泰傳子略懷帝即位遷使持節都督荊州諸軍事征南大將軍開府儀同三司京兆流人王道聚衆屯冠軍略遣左司馬曹據等進逼逼則諸王持節都督其屬當有左司馬此太宰左司馬或即安平獻王孚之屬官也

顧譜龜紐

右印文曰左衛將軍案宋志左衛將軍一人右衛將軍一人二衛將軍掌宿衛營兵二漢魏不置晉文帝

爲相國相國府置中衛將軍武帝初分中衛置左右衛將軍以羊羣爲左衛趙序爲右衛二衛江右有長史司馬功曹主簿江左無長史

晉職官志畧同

唐六典左右

衛注云秦漢始置衛將軍後漢及魏並因之然增其班秩晉文帝置臺又置中衛將軍武帝受命分爲左右二衛各大將軍一人品第四銀章青綬

瓦鈕

查氏張氏顧譜鼻鈕

右印文曰中衛司馬案即中衛將軍之屬宋志言二

衛將軍漢魏不置晉文帝爲相國相國府置中衛將軍武帝初分中衛置左右衛將軍二衛江右有司馬据此印知中衛亦有司馬可以補史之闕略唐六典注云宋永初元年詔二衛儀注可增爲九十人又左衛領營五十司馬二十五人右衛領營四十司馬二十人亦不知有中衛司馬

毛鑑

右印文曰前軍司馬案宋書百官志言左右前後將

軍魏明帝時有左軍將軍然則左軍魏官也晉武帝初又置前軍右軍太始八年又置後軍是爲四軍晉志又言後省左軍右軍前軍後軍爲鎮衛軍印爲王月鋤藏

顧譜

右武衛佽飛武賁將印集古印譜曰後漢曹公爲丞相有武衛營魏文帝置武衛將軍以主禁旅則此豈其屬官歟中溶攷晉志二衛始制前驅由基強弩爲

三部司馬各置督史左衛熊渠武賁右衛佽飛武賁此當即右衛佽飛武賁之印左衛無佽飛故但言武衛而不曰右也此當爲晉印

湯氏顧譜

右司馬督印案晉書輿服志中朝大駕鹵簿司馬督在前中道左右各司馬史三人引仗左右各六行外大戟楯二行又職官志諸公及開府位從公加兵者增置司馬一人秩千石主簿記室督各一人則此爲

晉印無疑

顧誦

右司馬史印案晉書輿服志中朝大駕鹵簿司馬史
九人引大戟楯二行則此爲晉印無疑

查氏

右新平邸閣督印攷續漢書郡國志注引袁山松書
曰興平元年分安定鶻觚右扶風之漆置新平郡晉

書地理志新平郡隸雍州又漢書百官表大鴻臚屬
官有郡邸長丞初置郡國邸屬少府中屬中尉後屬
大鴻臚師古曰主諸郡之邸在京師者也郡國志本
注曰中興省郡邸長丞但令郎治郡邸然無邸閣之
名又以督名官始見魏晉志而攷晉書趙王倫傳云
據城保邸閣成都王穎傳云運河北邸閣米十五萬
斛皆其證也故列此

湯氏

右新興治庫督印攷續漢書郡國志注引魏志曰建
安二十年省雲中定襄五原朔方置一縣領其令以
爲新興郡晉書地理志云新興郡惠帝改爲晉昌郡
隸并州宋書州郡志廬陵太守遂興男相下云吳立
曰新興晉武太康元年更名永初郡國無此縣何徐
並省又新興太守下云永初郡國何徐云新興吉陽
東關三縣屬晉昌郡何云晉元帝立本巴漢流民宋
末省晉昌郡立新興郡則吳與晉宋皆有新興郡矣
兩漢無治庫及督之名攷宋書百官志衛尉下云晉

右掌治鑄領治令三十九戶五千三百五十治皆在
江北而江南惟有梅根及冶塘二治皆屬揚州不屬
衛尉衛尉江左不置宋世祖孝建元年復置舊丞一
人世祖增置一丞又云東治令一人丞一人南治令
一人丞一人江左以來省衛尉度隸少府宋世雖置
衛尉治隸少府如故江南諸郡縣有者或置治令或
置丞多是吳所置而攷隋書百官志載梁制有東治
小庫丞及東治大庫丞齊梁多承晉宋之制而攷齊
書袁彖傳彖坐過用祿錢免官付東治世祖幸治履

行庫藏敕見彖與語明日釋之蓋治庫之官亦非始於梁明矣且此印亦稱督故亦附列於晉又唐六典掌治署令注云秦及漢諸郡國出鐵者置鐵官長丞晉衛尉屬官有治令丞各一人掌工徒鼓鑄過江省衛尉而治令始隸少府宋有東治令丞西治令丞齊因之梁有東治令西治令云云又諸治監下注云晉令諸治官庫各置督一人則此印即是矣後漢書杜詩傳遷南陽太守善於計略省愛民役造作水排鑄爲農器章懷注云拼音蒲拜切治鑄者爲排以吹炭

令激水以鼓之也排作橐

南監本誤橐舊監本誤橐

惟元板作橐

橐稍不合今据

玉篇改正玉篇云
吹大囊蒲耳切

古字通用桂未谷

穀

札璞言彰德

府西行四十里有地名水冶蓋昔人作水排處因以

名也排謂排橐以韋爲之鼓風吹炭用冶鐵以水代

人故曰水治武昌記北濟湖本是新興治塘湖元嘉

初廢水治者以水排治云云則新興治似當在

湖北

印存

右印文曰宣陽門候攷續漢書百官志城門司馬一人千石每門候一人六百石晉書地理志河南郡洛陽南有四門一曰宣陽宮闕簿西漢有小苑門在午上晉改曰宣陽門一云移門卽宜陽門也此亦爲晉印無疑

大年據陸元珪秦漢印型摹補

顧譜

范譜鼻劍

右印文建下當是春建春亦門名攷晉書地理志洛

陽東有三門一曰建春則乃晉印也

范氏鼻鈕

右印文曰津陽門候案此印形制字文與前印相類當爲同時物

龜鈕

右甯遠將軍章案宋志甯遠將軍晉江左置下一印文異

右甯遠將軍章形大而文又異非同璫物

璫鉗

右廣武將軍章案宋志廣武將軍晉江左置下二印
文少異

顧譜塗金璫鉗

右龍驤將軍章案宋志龍驤將軍晉武帝始以王濬
履之

右龍驤將軍章形亦大而章字左半不全與前甯遠
將軍同又龍字亦增馬旁皆與上印異非同時物也
案北魏高湛墓志作驤驤或其時物

右驥威將軍印案驥威將軍見宋志四十號將軍內云或是後漢及魏所置則亦可列於漢魏

印存

右熊渠將印案晉志基彊弩爲三部司馬各置督史左衛熊渠武賁右衛佽飛武賁又隋書百官志言天監初梁武帝釐定將軍班其不登二品應須軍號者凡十四品八班候騎熊渠爲七班此但稱將而不稱將軍稍異

印叢龜鉤

右左積弩將軍章案積弩士已見後漢書烏桓鮮卑傳又宋志彊弩將軍至東漢爲雜號前漢至魏無積射晉太康十年立射營弩營置積射彊弩將軍主之

右左積弩將軍章案宋書百官志言太子左積弩將軍十人太子右積弩將軍二人漢東京積弩將軍雜

號也無左右之積弩魏世至江左左右積弩爲臺領營兵宋世度無復營矣又隋志言染制左右積弩將軍各一人而魏書官氏志從第四品下有左右積弩射將軍蓋積射卽積弩也

右左積射五百人督印此當卽左積射將軍之屬詳上

印叢橋鉏顧譜鼻鉏

右千人督印案千人督見魏書官氏志第六品中而前印有五百人督之稱則千人督當亦起於晉也

印存顧譜羊鉏

右印文曰龍驤將軍長史案將軍屬官皆有長史及司馬龍驤將軍詳前

顧諺

右龍驤司馬之印當卽龍驤將軍之屬

桂氏

右印文曰驃騎參軍當是驃騎將軍屬官案驃騎將軍漢官據宋書百官志言晉初持節都督者置參軍六人趙王倫爲相國置參軍二十人江左以來參軍無定員矣中溶攷此類後漢時已有之如孫堅爲車

騎參軍亦即車騎將軍之屬也

大年據印史摹補

桂氏

右印文曰諮議參軍案宋志晉元帝爲鎮東大將軍及丞相置從事中郎無定員分掌諸曹有錄事中郎度支中郎三兵中郎其參軍則有諮議參軍二人主諷議事此爲晉印無疑

大年據印史摹補

顧諳龜鈞

龜鈞

右印文曰參軍都尉參軍之名詳前案宋志言參軍都護江左置本皆領營有部曲今則無矣此都尉當節都護之類下一品參下文反餘皆相似

右印文曰填蠻軍司馬案宋志南夷校尉晉武帝置治甯州江左改曰鎮蠻校尉四夷中郎校尉皆有長

史司馬參軍魏晉有雜號護軍如將軍今猶有鎮蠻
安遠等護軍鎮蠻以加廬江晉熙西陽太守安遠以
加武陵內史隋志亦言梁於甯州置鎮蠻校尉西陽
南新蔡晉熙廬江等郡置鎮蠻護軍此鎮蠻司馬當
即鎮蠻校尉及護軍之屬官惟此印文五字與新莽
諸印相似或亦莽時已有填蠻軍之名目亦未可定
鎮與填古字亦通

鎮譜鼻紐

右行營左護軍印案晉志魏初置護軍將軍元帝永
昌元年省護軍并領軍明帝大甯二年復置領護各
領營兵又宋志言魏晉江左領護各領營兵江左以
來領軍不復別營總統三衛驍騎材官諸軍猶別有
營也領護資重者爲領軍護軍將軍資輕者爲中領
軍中護軍此印文云行營左護軍當是隨駕領軍之
官而分左右以別於中護軍也

顧譜螭鈕

同上

右行營右護軍印案前稱左此稱右當爲同時物惟
印較前小而文作兩行爲異又一印更小於前且無
印字

顧譜

右澹如護軍章案護軍之名始於漢末此云澹如護
軍無攷而篆文多繆非漢物也或亦晉時雜號護軍
也

查氏

右口道護軍章案篆文多繆道上一字不可辨當與
前印同時物

查氏

右印文曰騎部曲將案晉制有騎部督今世每見有
騎部曲督印則此當即騎部曲之將而督則其屬官
也又一印曲字倒亦奇

鼻鉢

右印文曰騎部曲督集古印譜曰晉書朱伺自騎部
督加綏夷都尉後以功封亭侯領騎督

顧譜龜鉢

右義興太守章案宋志義興郡晉惠帝永興元年分
吳興之陽羨丹楊之永世立永世尋還丹楊又晉志
言永興元年以周玘創義討石冰割吳興之陽羨并

長城縣之北鄉置義鄉國山臨津并陽羨四縣又分丹陽之永世置平陵及永世凡六縣立義與郡以表祀之功屬揚州

顧譜龜紐

右義城太守章案宋志義成太守晉孝武立治襄陽
成城古通

顧譜

右右將軍會稽內史之印集古印譜曰斗鈕中空刻印兩面合漢丁爲之者中央文朽處乃丁柄穿食小點晉永和八年王羲之自護軍右將軍代王述爲會稽內史唐太宗貞觀四年虞世南書孔子廟碑成刻石以拓本進呈太宗加愛賜以此印是印歸虞

顧譜塗金鏡錄

右印文曰郡五官佐案漢郡有五官掾而無佐集古印譜曰蘭亭詩有郡五官佐謝懌是晉印無疑

吳氏

右豐縣令印案漢晉沛郡皆有豐而攷漢篆令等輩
名印俱以之字足成四字無加縣字者此或是晉印
此印見范譜云鼻紐皆與此合當先范所藏也

右費縣令印與前形制略同亦當爲晉印費晉屬琅
邪國

右西安令印攷西安漢縣名屬齊郡而此印文多乖
繆不似漢物晉地理志齊國有西安縣此當是也

顧譜鼻祖

右高安令印案宋志九真太守高安令下云何志晉
武帝立太康地志無吳錄晉分常樂立而晉志九真
郡有常樂無高安非也可以補其闕漏集古印譜曰

晉安帝義熙初分沮陽縣地置高安縣未知何据

劉存

右印文昌上一字不全案晉志天水郡有始昌則此是始昌令印也

金氏鼎鉏

右口麻令印麻上一字不可辨攷晉志建甯郡有牧
麻晉安郡有溫麻宋志建甯太守牧靡令云漢舊縣

麻又作靡此印令字之首與諸漢印不類當爲晉印

張氏

右印文曰酒泉福祿長案漢書地理志酒泉郡武帝
太初元年開有祿福不作福祿外舅潛研堂金石文
跋尾云續漢志作福祿晉隋唐諸志皆因之曹全碑
云拜酒泉祿福長魏志龐涓傳及皇甫謐列女傳載
龐娥事云祿福趙君安之女又云祿福長尹嘉然則
漢魏之間猶稱祿福其改爲福祿蓋在晉以後也中

溶又案漢令長印多不聯郡名晉志涼州酒泉郡亦有福祿則此或是晉印也惟攷所見歷代令長印皆無郡名印文五字頗似莽制然莽改令長爲宰又改酒泉郡曰輔平祿福曰顯德皆不合此印疑是近代人僞作

查氏

右江甯長印案晉志江甯屬丹陽郡太康二年分建鄴置宋志言晉武帝太康元年分秣陵立臨江縣二

集正官印
卷二
年更名

顧譜烏鵲錄

右津梧長印案晉志九真郡有津梧宋志九真太守
津梧長下云晉武帝分移風立

楊氏譜

右壽昌長印案晉志吳郡有壽昌宋志吳郡太守
昌令下云吳分富春立新昌縣武帝太康元年更

名此印文稱長不稱令當爲晉印

顧譜

右萬安長印案晉志無萬安而宋志甯州刺史下有
萬安長云江左立當當爲晉印則晉志無萬安乃脫漏
也

顧譜

右廣化長印案晉志高興郡有廣化宋志宋康太守

廣化令下云晉太康地志有屬高興永初郡國屬高涼此印文

顧譜

右浦陽長印案晉志九德郡有浦陽宋志九德太守浦陽令下云晉武帝分陽遠立此印亦稱長與前壽昌長同

右熾煌長印攷熾煌漢舊縣晉亦屬熾煌郡此印文
不工整又四周起界線不似漢印當爲晉以後物

顧譜鼻鈕

右永昌長印案晉志零陵郡有永昌宋志零陵內史
蜀郡太守新會太守俱有永昌令此亦稱長同前

顧譜鼻鈕

右宣口長印文甚繆宣下當是威字案兩漢武威郡

皆有宣威晉志同此當爲晉印

右新陽長印攷新陽漢汝南郡有然此印文多乖繆不類漢印宋書州郡志竟陵太守下有新陽男相云永初郡國有何徐不注置立而攷後魏書地形志魯郡有新陽云漢屬東海後罷劉駿復魏因之則晉末亦有此縣故列此

右高安丞印詳前令印

右印文曰臨津左尉案晉志永興元年割陽羨置臨
津等四縣立義興郡餘詳前太守印下

右試守陰密令印案陰密西漢屬安定郡東漢郡廢晉復置攷漢高頤碑有爲武口令試守廣漢屬國郡尉之語以百官志攷之漢官無試守之名且印文亦草率不工當爲晉印晉書職官志言漢尚書郎初從三署詣臺試守尚書郎中歲滿稱尚書郎又隋書百官志言後齊制官多循後魏而敍祿之制言事繁者優一秩平者守本秩閑者降一秩長兼代守者亦降一秩又魏書官氏志言餘官雜號多同於晉則官有試守之名當始於晉明矣

右試守蓮勺令印攷蓮勺漢縣晉亦屬馮翊郡例與
前同印爲家潁山弟藏

右印文六字制與前二印同首亦稱試守而其下二
字文繆不可辨識

桂氏

右試守東阿長印案東阿本漢縣亦見晉志與上陰
密令印稱試守同一例正其同時物也桂氏書載此
印文阿作卽乃誤釋作陶收入虞韻不知从可从句
之字漢人隸變已多相混易譌矣故尙書盡執拘以
歸於周據說文引於柯不可證拘乃柯之誤又許叔
重自序言廷尉說律以止句爲苛皆是也